

重刊題德府志

歸德府志目錄

卷首

圖經

歸德府境總圖

歸德府城池圖

商邱附郭

商邱縣境圖

甯陵縣城池圖

甯陵縣境圖

鹿邑縣城池圖

鹿邑縣境圖

夏邑縣城池圖

夏邑縣境圖

永城縣城池圖

永城縣境圖

虞城縣城池圖

虞城縣境圖

睢州城池圖

睢州境圖

考城縣城池圖

考城縣境圖

柘城縣城池圖

柘城縣境圖

卷一

方輿沿革表

卷二

古封建表

卷三

職官表一

古職官上

卷四

職官表二

古職官下

卷五

職官表三

今職官

卷六

選舉表一

徵辟諸科 進士科

卷七

選舉表二

舉人 武進士 武舉

歸德府志
目錄
卷八

選舉表三

貢生

卷九

地理略上

星野

疆域

市集

鄉村

卷十

地理略下

山川

形勝

風俗

卷十一

建置略上

城池

官署

卷十二

建置略中

儒學

書院

義學

卷十三

建置略下

坊表

倉庫

恤政

驛舖

卷十四

水利略一

河防

諸水故道附

卷十五

水利略二

總境水勢甯陵諸水

商邱諸水

卷十六

水利略三

鹿邑諸水永城諸水

夏邑諸水虞城諸水

卷十七

水利略四

睢州諸水
柘城諸水

考城諸水
各境橋梁

卷十八

賦稅略土

地畝
起運

人丁

征賦

漕糧

卷十九

賦稅略下

存留
土產

驛站

鹽引

雜稅

卷二十

名宦略上

兩漢

三國魏

南北朝

唐

後五代

宋

元

卷二十一

名宦略下 明 皇朝

卷二十二

人物略一 鄉賢

卷二十三

人物略二 鄉賢

卷二十四

人物略三 鄉賢

卷二十五

人物略四 鄉賢 武功 義行 寓賢

薛德府志 目錄
卷二十六

人物略五 列女士

卷二十七

人物略六 列女下

卷二十八

祀典略上 文廟 祭儀 祭器 樂器
名宦祠 鄉賢祠 諸壇祀

卷二十九

祀典略下 諸祠廟

卷三十

藝文略

學宮經籍
郡縣志乘

名家著述

金石文字

卷三十一

武備略

歷代兵燹
駐防附

衛兵舊制

營兵今制

卷三十二

古蹟略上

名勝
園亭

卷三十三

古蹟略下

第宅
寺觀
陵墓

卷三十四

災祥略

卷三十五

識小略上

卷三十六

識小略下

歸德府志卷九

地理略上 星野 疆域 山川

序曰房心爲豫州乃宋之分野顧宋野地名見于春秋三傳凡六十有九不專在今歸德也如曰郟曰貫曰亳曰袞曰緡曰蕭曰薄曰曹曰呂留曰城郟曰幽邱曰老桃曰彭城今皆割入他省可攷而知他若鹿邑在春秋爲鳴鹿屬于陳若睢州在春秋爲襄牛屬于衛則今歸德所屬又未可專稱宋郡矣竊嘗攷古書言地理者杜氏通典舉四至元

和郡縣圖志詳八到以是知區分疆域乃言地理之大要也而疆域之要尤在山川禹貢九州皆以山川定疆界故山川次之其平原沃壤或往來貿易而成市集或廬井有伍而著鄉村欲辨方隅者雖一街一巷一村一里亦所弗遺而况申畫郊圻脊固封守就此邦之形勢稽前代之安危漢梁孝以單國扞吳楚勁鋒吳楚限而不敢西唐張許以孤城遮漁陽百萬之寇沮其猛銳而不得南斯其要害大槩可見或者疑邇來承平日久習尙澆漓

問所謂忠義之風仁厚之俗恐非隆古不知故家
遺澤禮教信義猶有存者樹之風聲納之軌物寧
非守土者之責與

星野

味爲鶉火心爲大火陶唐氏之火正閔伯居商邱祀

大火而火紀時焉相土因之故商主大火春秋左氏傳

宋大辰之虛也左氏傳心宋之分野也左氏傳大火宋

周禮保章氏鄭註宋鄭之疆候在歲星占于房心史記天官書

房心宋淮南子歲星房心皆東方之星故宋鄭占候

也

史記正義

氐房心宋之分野豫州

史記正義

房心豫州

前漢

天文志

自氐五度至尾九度爲大火于辰在卯宋之

分野屬豫州

晉書天文志

房心宋豫州沛郡八房四度

梁國入房五度淮陽入心一度

晉書天文志

心爲宋分

魏書天文志

氐房心大火也初氐二度餘于四百一十

九秒五太中房二度終尾六度商亳負北河陽氣

之所升也爲心分豐沛負南河陽氣之所布也爲

房分其下流與尾同占西接陳鄭爲氐分

新唐書天文志

自氐五度至尾九度曰大火之次于辰在卯謂之

單闕于律爲無射斗建在戌今宋分野帝王一統世紀

志載歸德兗豫二州之域星躔角亢分野而商自

古屬房心大火之次或角亢之說以前屬州統于

開封而總冠之也考天官氏十六度房六度心六

度而氏房心自宋東至徐南至蒙城北至濟甯魚

臺西至杞是氏房心皆歸德也又按舊志載歸德

星野在房心大火之次大約以唐志爲據按宋元

互有不同明劉基則云起氏一度一十四分至尾

二度大約宮次不離大火宿度不離房心我朝

按之新歷大火距宿起亢二度三分至房二度五十八分較之唐志將差十度况前此者乎是不得株守甘石費蔡之成法久而不變也所以然者七政東行恒星亦東行每七十二年星去節氣一度積二萬五千九百二十年而一周天宿房心正當大火今心星全入于析木房心又半出大火矣將以官次爲主乎今之分野屬大火則星度當爲氐亢矣抑以星度爲主乎今之分野爲房心則官次將爲析木矣是不得專師一唐志而足者要之心

宋之分野又左氏以參商二星分屬晉宋則宋爲

商邱又上應商星也

歸德府舊志

謹按前人論郡縣修志不必言星野然班氏有云宋大國故自爲分野又左傳稱闕伯相土皆主火正歷攷史漢晉魏諸史俱詳及宋分因據經傳史志錄之而附以舊志至所屬州縣終難參以推步確指隸天何度矣

疆域

歸德府在省城東三百里東至蕭縣西至杞縣南至

陳州北至曹縣廣四百七十里袤三百二十里

府舊

志距京師陸路一千五百五十里水路二千三百

里

新增府志

商邱縣附郭東至夏邑縣界六十里到縣一百一

十里西至寧陵縣界四十五里到縣六十里南

至鹿邑縣界七十里到縣一百二十里北至山

東曹縣界七十里到縣一百三十里東南至江

南亳州界九十里到州一百二十里西南至柘

城界六十里到縣九十里東北至虞城界三十

五里到縣六十里西北至考城界六十里到縣
一百三十里東西廣一百五十里南北袤一百

四十里

商邱
縣志

寧陵縣在府治西六十里東至商邱縣界十八里
到縣六十里南至柘城縣界四十里到縣七十
里西至睢州界二十里到州五十里北至考城
縣界三十里到縣七十里東南到鹿邑縣一百
三十里西南到太康縣一百一十里西北到儀
封縣一百一十里東北到山東單縣一百七十

鹿邑縣志 卷之六
里廣三十八里袤七十里

寧陵縣志

鹿邑縣在府治南一百二十里東至江南亳州界
二十里到州五十里西至太康界七十里到縣
一百三十里南至沈邱界八十里到縣一百六
十里北至商邱界六十里到縣一百二十里東
北至夏邑界六十里到縣一百六十里西北至
柘城界四十五里到縣六十里西南至陳州界
七十里到州一百七十里東南至江南太和縣
界七十里到縣一百八十里廣九十里袤一百

四十里

鹿邑縣志

夏邑縣在府治東一百里東至江南蕭縣六十里

到縣一百五十里西至商邱縣界三十五里到

縣一百里南至永城縣界三十五里到縣九十

里北至虞城縣界三十五里到縣七十里東南

到江南亳州一百二十里西南到鹿邑縣一百

八十里東北到江南碭山縣七十里西北到山

東曹縣一百七十里廣九十里袤七十里

夏邑縣志

永城縣在府治東南一百八十里東至江南宿州

界五十里西至商邱縣界六十里南至江南宿州界四十里北至江南碭山縣界七十里東南至宿州界三十里西南至亳州界八十里東北至蕭縣界九十里西北至夏邑縣界五十里廣

一百里袤一百三十里

新增永
城縣志

虞城縣在府治東北七十里東至江南碭山縣界五十里到縣九十里西至考城縣界五十里到縣一百四十里南至夏邑縣界二十里到縣七十里北至山東單縣界三十里到縣七十里東

南到永城縣一百六十里西南到商邱縣七十
里東北到城武縣一百二十里西北到山東曹
縣一百一十里東西廣一百里南北袤五十里

虞城

縣志

睢州在府治西一百一十里

府志云東連于
府一百二十里

西至

開封府一百八十里至杞縣七十里東至歸德

府一百一十里至寧陵縣五十里南至太康縣

九十里東南至柘城縣九十里北至儀封縣九

十里東北至考城縣九十里

睢州志

東寧陵西杞

縣南太康北儀封廣六十里袤一百一十里

府舊

志

謹按睢州志詳四至而未詳八到且所載四至與舊府志有異當從州志爲是

考城縣在府治西北一百二十里東至曹縣界三十里到縣五十里南至甯陵縣界三十五里到縣七十里西至儀封縣界二十里到縣六十里北至直隸長垣縣界二十五里到縣一百六十里東南到府城一百二十里西南到睢州九十

里東北到定陶縣九十里西北到封邱縣二百

里廣五十五里袤七十五里

考城縣志

謹按考城志稱至不稱到茲特分析改正

柘城縣在府治西南九十里東至商邱縣界三十
五里到縣九十里南至鹿邑縣界三十五里到
縣六十里西至太康縣界四十里到縣八十里
北至寧陵縣界三十五里到縣八十里東南到
亳州一百里西南到陳州一百二十里西北到
睢州九十里東北到虞城一百五十里廣八十

里表六十里

新增府志

謹按柘城志于疆域四至未詳舊府志亦祇

載東商邱西太康南鹿邑北甯陵而已茲因

增入

山川

幸山

舊府志在府城南三里宋靖康元年高宗趨幸應天府命築臺于府門之左受命卽皇帝

位卽此

國朝劉德昌詩

徒步訪幸山幸山空陳迹白日飛沙黃茫茫荒草積皇宋厄陽九誰

能建碩畫烽烟滿區寰朝野惟跼蹐二帝竟蒙塵援救終無策康王踉蹌問此地受符冊大梁遂爲

墟天命于焉革愁聞
遠寺鐘懷古深嘆惜
范崇儒詩雲封野寺水潺湲
南渡君臣輕社稷北來戎馬徧塵寰
五陵風雨卽山裏二帝衣冠瀚海間
飄泊天涯千載恨遊人弔

古汨
潛潛

商邱

商邱縣志在城西南三里高八十八尺周二百步說者謂邱之精氣上應列星世稱閼伯

臺卽是邱也

唐高適詩

閼伯去已久高邱臨道傍人皆有兄弟爾獨爲參商終古猶如此而人安可量

儲光羲詩

河水日夜流客心多殷憂維艗歷宋國結纜登商邱漢皇封子弟周室命諸侯

遙遙世祀遠傍古復兼秋鳴鴻念極浦
明李嵩詩

征旅慕前儔太息梁王苑時非枚馬游
莽莽孤城外天高斲此臺炎輝猶照耀帝子已蒿萊
烏雀春呼亂牛羊夕下來淒涼殘碣在讀罷一

典國朝陳維崧詩輕颺淨織埃綠蕪沒芒屨漸漸
哀遊散屨愜所遇遙心會鳴禽霽目契芳樹迤衍歷
陂陀陁峴莽迴互峻層觀高阜人云闕伯墓纓巒
蕩游氛帶壑歛宿霧嗟此高辛裔明禋啟庶祚奈
何與實沉同氣相抵牾閤此田中其哀哉一尺布
太息不能言

藤花落如雨

澇邱

商邱縣志在城北十里有磚塔明永樂十三年圯于水

楚邱

商邱縣志在城北四十里春秋時爲宋邑其故境今半入曹縣

穀邱

舊府志在府城南四十里春秋桓公會宋公于穀邱卽此

青岡

商邱縣志在城西南二十五里

杏岡

商邱縣志在城東南五十里

元明河

舊府志在府城東六里宋太祖爲歸德節度使嘗飲馬于此又名飲馬池

隕石河

商邱縣志一名漆溝在城北春秋隕石于宋五相傳水涸時五石宛然

南湖

舊府志在府城南五里宋晏元獻嘗放馴鷺于此

國朝劉文蔚詩

穉柳夭桃歲歲開菟園臺榭盡蒿萊只餘一片南湖水曾照梁王左

蠡來

元獻風流此地多隼旃熊軾想經過于今馴鷺非關放白羽時來點綠波

黑龍潭

舊府志在府城西北二十里水黑因名

鳳池

舊府志在府城西北三十里以上商邱縣

鎮頭岡

甯陵縣志在縣南三十里

甘露嶺

舊府志在甯陵縣西五里隋文帝幸岱至此甘露降因名

大谷岡

舊府志在甯陵縣西北四十里

茅岡

黃岡舊府志俱在甯陵縣南四十里

駝腰岡

甯陵縣志在縣西南十里

豆岡

舊府志在甯陵縣西南三十里

尖岡

舊府志在甯陵縣西二十五里

七星堆

甯陵縣志在縣西北三十里

童鉤堦堆

甯陵縣志在城南二里又名童相磚包高丈許長五丈餘以上甯陵縣

隱山

鹿邑縣志在縣東十一里相傳爲陳搏煉丹處

陰靈山

鹿邑縣志在縣東十一里舊府志山形盤旋磅礴遠視則陰氣冥昧

黑龍潭

鹿邑縣志在城東濠外數步

陽都陂

鹿邑縣志在縣南四十里舊志訛作都陽

偃王陂

鹿邑縣志縣西南四十里虎頭岡北

橫嶺

鹿邑縣志縣西南二十五里起伏斷續綿亘三十餘里

虎頭岡

鹿邑縣志縣西南四十里岡匝一里蹲踞如虎形以上鹿邑縣

無影山

夏邑縣志縣東郭外一里許巋然一阜今已平曠

黑虎澗

夏邑縣志縣東郭之半里俗傳有黑虎負于此因名以上夏邑縣

碭山

永城縣志在縣北八十里即漢高隱處其山之別名曰磨曰白毛曰石洞曰黃玉曰戲山

諸稱橫亘幾二百里與江南界連

虞山

舊府志在永城縣北九十里亦名漁山山前有釣臺存焉

栢山

永城縣志在縣東南二十五里澮水之地山下有栢山集

焦州湖

永城縣志在縣東南十里俗名焦種

柳園湖

永城縣志在縣西九十里

大鴨湖

永城縣志在縣西北十二里

白菱湖

永城縣志在縣西南六十五里以上永城縣

三岡

虞城縣志稍岡在縣東南二十五里柱岡在縣東北四十里大岡在縣西北三里俗所傳

三岡者即此

孟豬澤

尚書禹貢被孟豬孔疏孟豬在梁國睢陽縣東北左傳爾雅作孟諸周禮作望諸蔡

傳今南京虞城縣西北孟諸澤是也左傳
杜註孟諸宋藪澤水草之交曰糜古糜字
與湄通用寔字記虞城縣志孟諸澤俗呼爲湄
臺蓋澤中有臺也虞城縣志孟諸澤在舊
縣西北今陂中有臺民呼爲湄臺其地高
腴禽鳥滋泳楊雄賦云奢雲夢侈孟諸高
適封邱作亦有我本
漁樵孟諸野之句

明范良彥詩

世遠陂荒近若何澤南澤北盡青莎
空餘鳥雀鳴郊樹無復魚龍聽棹歌

雨霽尚饒烟和渚風來猶憶水如羅
清宵還憶當時月會照遊人醉芰荷

空桐澤

虞城縣志在縣南五里按左傳宋景公游
于空澤卒于連中壬申奉公自空桐入杜

註曰空澤宋邑連中館名梁國虞縣
東南有地名空桐以上虞城縣

恒山

睢州志城西北十二里
峯巒南向爲州主山

金鎖嶺

舊府志嶺在睢州治後墜然而高避水患者多居于其上

駱駝岡

舊府志州東南半里其形起伏如駝故名

睢州志岡陰曰桃花洞相傳春三月有桃花片自洞中出今隱于水岡前坡陀有甘菊泉清冽宜茗一郡之勝也水南曰襄臺

如屏如幃

鳳凰嶺

睢州志南城橫亘者曰鳳凰嶺曰鞍子嶺居人所以避水患也

厚臺岡

睢州志城西南曰厚臺岡長岡中岡東南曰黃岡平岡安陵岡河堤嶺北則荆岡澗

岡龍臺岡野鷄岡大濟岡諸名

繆堤嶺

睢州志一名繆堤嶺梁孝王徙睢時築隋煬帝訪其遺址而增廣之

大麓岡

睢州志大麓岡奠位于乾帝邱突兀于良有拱衛之象焉

睢水

桑欽水經睢水出梁郡鄆縣又東過睢陽縣南
酈道元水經注睢水又東逕襄邑縣故城北又東逕雍邱城北睢水又東逕甯陵縣故城南故葛伯國也又東逕睢陽縣南城南周武王封微子啟于宋以嗣殷後爲宋都也
睢州志睢水首受凌儀葦蕩渠至此始大東經取慮縣入泗州之得名以此韓信壅睢水蓋其下流今不知所在

謹按尙書蔡傳以睢水爲沮水而志家遂謂郡在兗州之域攷地理今釋云元和志灑水

沮水俱出濮州雷澤縣西北平地宋時河決

曹濮間灑沮適當其衝久而泥淤二水遂涸

蔡傳乃欲以汜睢當之韓汝節謂汜睢在豫

徐之境無與于兗州嘗按志所指之地而討
求源流卒莫得其地亦莫能名其確爲何水
雖有故迹蜿蜒而脉絡終難強合惟有闕疑
而已

繪水

睢州志述異記云睢渙二水波紋皆成五色
其人多文章故名陳留風俗傳曰睢渙之間
出文章天子郊
廟御服供焉

濯錦池

睢州志邑之善織錦者
環池而居故得名焉

西湖

睢州志城西曰西湖一曰萬
糧坡今皆湮廢 以上睢州

葛岡

舊府志在考城縣南二里世傳葛洪
煉丹處又曰葛伯所築未知孰是

臥龍岡

考城縣志在縣南二十五里俗傳漢丞相諸葛亮築

固德岡

舊府志在考城縣西南二十五里

蒙澤

考城縣志在縣東三十里方輿勝覽云考城東有蒙澤乃莊周故里也以上考城

廓山

舊府志山在柘城縣東北二里狀如山形爲城之鎮土

山臺

柘城縣志在城西二十里高大如山

曲岡

柘城縣志在縣城北三十里

褚岡

柘城縣志在城西北四十里

霸王岡

舊府志在柘城縣西三十里世傳項羽將臺與漢高拒兵處

郭村岡

柘城縣志在城北五里

明淨岡

柘城縣志在縣西北四十里

力士岡

柘城縣志在縣西南十里

呂岡

舊府志在柘城縣南十里

索垆

柘城縣志垆在城東北二十五里按垆類乎山者也他若青垆在城東十五里李鐵垆在城北十五里劉信垆在城東北二十里慈聖垆在城西北三十里李垆在城東北四十里

皆以垆名

許家灣

柘城縣志城東南六里黃河所經也以上柘城縣

謹按府境多平壤所謂山者不過爾雅一成

再成之邱曰岡曰嶺皆童阜耳川則孟瀦最

爲著名凡涓流濬注無關水利者必爲歷記
若河防諸水道以及溝渠堤堰俱志水利茲
不贅述

歸德府志卷十

地理略下 里集 形勢 風俗

里集

商邱縣領編戶二十七里曰北社南社東社西社
東曲睢鄉中曲睢鄉西曲睢鄉北曲睢鄉北馬
牧鄉中馬牧鄉南馬牧鄉東葛驛鄉西葛驛鄉
中葛驛鄉忠信一鄉忠信二鄉甯得一鄉甯得
二鄉永安一鄉永安二鄉永安三鄉永安四鄉
永安五鄉永安六鄉永安七鄉永安八鄉永豐

一鄉舊府志

城以內街衢曰大隅首者城之中心也隅之東出賓陽門者曰義字一街二街隅之西稍北出埕澤門者曰澤字一街二街三街隅之南出拱陽門者曰元字一街二街三街四街隅之北出拱辰門者曰禮字一街二街三街四街其義字街之南出者府前曰宣化街稍東曰文塲爲街四又東曰鳳池爲街四又東曰睢陽爲街四義字街之北出者府東則有義字街三又東則有

孝字街三府後則有孝字街三其澤字街之南
出者曰教字街一亨字街四稍西曰化字街二
利字街二又西曰仁字街一貞字街三澤字街
之北出者曰教字街一稍西曰化字街四又西
曰仁字街四其元字街之東出者曰孝行街三
稍南曰正人街三又南曰君子街又南曰仁義
東巷元字街之西出者曰老字街三稍南曰仁
和街三又南曰利字街二又南曰禮義街二又
南曰仁義西巷其禮字街之東出者曰廉字街

三稍北曰信字街三又北曰忠字街二又北曰
弟字街二禮字街之西出者曰訓字街二稍北
曰習字街二又北曰順城街二又城內四周俗
呼馬道今孝字睢陽二街卽東馬道仁字貞字
二街卽西馬道仁義巷東西卽南馬道弟字順
城二街卽北馬道

商邱
縣志

城以外市集凡五十有五東有陳家集平家集
文家集馬收集劉家店侯家集宗祿村其西有
水池鋪觀音堂其南有古宋集留趙口李家口

十字河順河集包公廟沙壩店其北有鄧斌口
潘家口清涼寺平頂堦堆鄭村高家村其東南
則有蔡家道口穀熟集石榴堦站濟陽集閻家
集塢墻集宋家集柳林集營郭集界溝集黃塚
集杜家集馬頭寺韓村店沙土集其西南則有
毛堦堆郭村集勒馬集高辛集四大王廟趙段
店婁靳店開花店田家集東北則有丁家道口
孫家集朱孫集其西北則有小壩集車箱集謝

家集張家店三陵臺

新增
府志

寧陵縣領編戶凡七里曰長樂鄉安寧鄉崇善鄉

中和鄉來遠鄉遷善鄉向化鄉

舊府志

城以內舊街巷有七曰東大街西大街南大街
北大街小官街萬壽街懷仁街其爲知縣熊秉
元新開街巷亦有八曰崇文街順化街旌忠街
懷賢街陽和街崇正街太乙街多士巷其四周
則有官馬道馬道之西則有官水池

新增府志

城以外爲集十有四曰邏岡集趙村集張弓集
陽驛集孔家集桃園集溝鄉集柳河集石橋集

桃堙集黃岡集永安集黃家集

卽趙二庄

東服集其

爲村店二十有六曰七星村黃岡村柳園村丁

墻村排墓村焦堙村馬頭村總古村尖岡村茅

岡村寧靜村鞋城村受益村箭頭村唐城村陸

城村紙坊村楮堙村上樓村黃草村谷岡村火

食店土家店郭家店小店舖圈子村

新增府志

鹿邑縣領編戶三十四里考其圖曰在坊一在坊

二東臯一東臯二東臯三南豐一南豐二南豐

三西平一西平二西平三北甯一北甯二北甯

三長甯一長甯二長甯三永順一永順二永順

三考其鄉曰宣化太和普安仁義義賢忠孝豐

瑞安慶安定正德厚生利用時雍治平

新增府志

城以內爲街者四曰尙賢街循禮街崇真街孚

會街爲巷者七曰倉南巷倉門巷楊家巷鄧家

巷新塔巷水橋巷芙蓉巷

鹿邑縣志

城以外市集凡三十有三其東曰穀陽集東南

曰鄭家集王皮溜集東北曰棗子集安家溜其

南曰白馬驛丁村集

一名崇文集

孤柳樹

一名南豐集

竹

愷店汲水集其西曰護廂集趙村集試量集西
南曰汲塚集鄆城集石曹集秋渠集雙樓集任
與集甯平集吳臺廟虎頭岡生鐵塚其北曰馬
邱舖買家灘西北曰李原集安平集鉉武集梁
家口小厰集邱家集楊湖口魏家橋

新增
府志

謹按鹿邑鄉都條分路伍以虎頭岡爲縣之
適中區分之曰東北曰東南曰西南曰西北
凡四鄉焉于鄉之中又區分之爲路東北東
南二鄉則數而東自一路二路以及于九路

而止西北西南二鄉則數而西自一路二路以及于九路而止皆橫數于路之中又截爲伍自近而遠凡五里爲一伍自一伍二伍以達于盡境或十餘伍而止皆縱數以其縱橫皆得五里故謂之伍其法與他縣異頗有井田遺意因附攷焉

夏邑縣領編戶十三里曰一里二里三里四里五里六里七里八里九里十里十一里十二里十

三里

舊府志

城以內爲街者六曰文街武街東門街南門街
西門街北門街爲巷者三曰班家巷程家巷尹

家巷

夏邑
縣志

城以外凡鄉六曰大同齊邑濟陽長仁會亭歸
化其爲村三十有一曰八級村靈璧村石樓村

桑垆村黃垆村石井村雙尖村青團村徐七村

還鄉村大黃村謝呂村張家村南黃村呂團村

狼塚村大柳樹村平臺村大岡村謝家村楊家

村尙義村新興村會里村曹村秦村嚮鈴村小

店村魯家廟村美仁堦村飛騰橋村其爲集三十有四曰東關集南關集西關集北關集韓家道口集王村集夏家道口集司家道口集水栢道口集會亭集胡家橋集桑堦集營盤集劉福營集牛王堦集賀家集司家集太平集永興集何家營集程家集長興集永盛集沙河集戴家集王家集仁里集杜家集黃塚集駱家集生李集回龍集張秋集其店有七曰五里橋店胡家店楊家店郭家店劉家店濟陽店李家店

新增府志

永城縣領編戶二十四里曰在坊鄉一圖甫城鄉

八圖鄧善鄉四圖碭山鄉二圖保安鄉四圖歸

善鄉三圖從化鄉一圖

舊府志

歸仁鄉一圖

新府志

縣之集市凡四十有一其在城以內曰四關集

在城以外者西鄉曰會亭集馬牧集鄧陽集太

邱集永盛集和順集柳建集柘樹集興讓集白

馬橋集麻塚集雙橋集書案店集馬村橋集南

鄉曰裴家橋集王家集白廟集暉河集龍興集

東鄉曰合興集胡家庄集鐵佛寺集回村集丁

家集苗村橋集秦家集潘陸道口集北鄉曰山

城集永旺集薛家湖集中興集北望集洪家路

集北鎮集澤道口集陳家集寶家集邵伯集火

燒店集保安集

永城縣志

虞城縣領編戶十四里東鄉曰應南里應北里待

東里陽堙里義東里文一里南鄉曰義西里甘

南里元村里西鄉曰閭孟里給堙里北鄉曰待

西里甘北里姬塚里

虞城縣志

謹按舊志應善南鄉應善北鄉在縣西甘泉

南鄉甘泉北鄉在縣東待賓東鄉待賓西鄉
在縣北義原東鄉義原西鄉在縣南爲舊八
鄉元村鄉給堦鄉姬塚鄉陽堦鄉閭孟鄉五
鄉並文德一鄉爲新鄉六今據縣志現在所
分之里志之

縣之以村名者凡四十有三城之東曰栗子堦
村申壇村浪頭堦村秉靈堦村陽堦村菩薩堦
村京塚村知禮村小塚村小店村龍哨堦村待
邑村張四庄村王家口村桃樞村石門村高臺

村索塚村城之南曰白皂垆村高皇村雙金村

王排村南元村北元村南祝冢村北祝冢村里

垆村義原村閆孟垆村趙封村城之西曰牛里

村給垆村歡垆村南臨便村黎邱村北馬郎村

南馬郎村城之北曰南皇里村北皇里村郊垆

村北臨便村姬冢村光明村以市集名者凡二

十有四曰桃樞集稍崗集王家集

即舊志
黑垆集

順河

集民便集寓賢集大平集寧鄉集

即喬
家集

興安集

旺陽集五雲店恩興店懷德集鎮安集元村集

人和店永盛集萬興集公平集耿安樂集劉安

樂集重慶集良鄉店小喬家集

新增
府志

睢州領編戶四十里曰在坊里崇德里朝郭里霍
山里石岡里龍塘里郭村里中岡里長岡里回
示里西陵里東陵里匡墻里尹店里白寺里韓
庄里蛟龍里渾子里恒山里黃岡里金城里崇
信里王許里榆廂里韓村里曠德里王政里伯
當里犁岡里厚臺里南庄里栢岡里施仁里尙
義里安寧里三皇里鐵岡里高都里龍行里平

康里

舊府志

城以內街道凡十有三曰大街曰南後街北後街曰南北大街曰竹竿巷曰學門街曰板市曰豬市口曰春秋閣街曰關王廟街曰奎星街

曰鞍子嶺街曰湯家街

睢州志

州境內凡爲集鎮三十一曰馬官集白廟集河堤嶺集順河集仲亭集平岡集河陽集孫聚寨集潮莊集俞公集長岡集厚臺岡集匡牆集西陵寺集榆廂鋪集杜桐集羅陽店集老堤嶺集

尹嶺集渾子集澗岡集寄岡集龍塘岡集野鷄

岡集鐵佛寺集官亭集帝邱店集伯黨集大濟

岡集大成集小店鋪集

睢州志

考城縣領編戶十一里曰盟臺鄉希賢鄉歸厚鄉

黃村鄉堦德鄉付村鄉順義鄉子惠鄉崇德鄉

道義鄉遵道鄉

舊府志

城以內街道凡九曰南北大街東西大街縣西
橫街曰西街西小街曰新街曰南門內橫街曰

倉前小街曰學東小街

考城縣志

城以外集鎮凡十有四曰汪家集復興集葛垵
集大樊家集史村舖孫路口林七口會興集小
王家集小顏家集梁靖口新興集流通集舊縣

集

新增
府志

柘城縣領編戶九里曰永甯鄉招賢鄉定安鄉治

平鄉居仁鄉由義鄉安甯鄉聚流鄉懷土鄉

舊府

志

縣之市集十有一在城者則有四關集城以外
則有霸岡集伴家集起臺集磚橋集慈聖集遠

襄集柿黃集吳家集牛鬪集胡襄集其以店名者凡十有三曰二十五里店李灘店鷺鷺店青垌堆石家店周家店高店高八店尙家店八里店和樂村店會河路店開荒店

柘城縣志

謹按舊志止書戶里而郭內之街衢郭外之

村集皆闕焉茲據州縣諸志復攷現在所存

悉著于編以見生聚之盛云

形勢

歸德平行四達控江淮聯蕭碭祗河脇汴

宋國榮舊志

南控江淮北臨河濟彭城踞其左汴京連于右形勝聯絡足以保障東南襟喉關陝爲大河南北之

要道焉

宋繻商邱志

歸郡據江淮之上游爲汴洛之後勁春秋時宋以亡國之餘爭長于山東諸侯者數百年楚漢之相距滎陽成臯也彭越爲漢徇梁地往往攻下睢陽外黃等城絕其軍後破其積聚楚是以敗景帝時七國之變梁實當其衝吳楚不敢過而西卒以破滅後漢初劉永擅命于睢陽號名東方居然強敵

晉永嘉以後中原淪喪王師出于彭城梁宋爲必經之道而胡羯氏戎亦由此以震動淮泗蕭梁因元魏之衰嘗道出梁國席捲汴洛而不能保也蓋睢陽襟帶河濟屏蔽淮徐舟車之所會自古爭在

中原未有不以睢陽爲腰膂之地者

劉德昌商邱志

商邱供需獨繁而責成最先且當四通孔道食力

輿馬之役日僕僕不休又數有河患

舊府志

甯陵要衝與商邱同距河稍遠地沙瘠宜木棉附

城郭多爲圃

舊府志

甯陵右接汴梁左通鄒魯河洛流乎西北淮泗達

乎東南

王國甯甯陵志

鹿邑僻在府南境非衝衢

舊府志

夏邑地本下下歲多水患

舊府志

永城孤懸譙芒之間地廣賦重屬以水患田多賤

舊府志

碭山北峙澮水南環東接淮徐西聯梁宋

永城縣志

虞城在府之東北大河經其地水患居多

舊府志

黃河如帶芒山若礪枕之以閼伯之國連之以葵

邱之疆

虞城縣志

睢州俯徐淮而扼汴洛控陳亳而距大河古稱陳

留天下之樞此則爲陳留左輔又稱睢陽江淮之

保障此則爲睢陽右藩誠爲中原之望郡也

湯斌睢州志

志

考城居睢之北通曹濮路

舊府志

東挹孟豬西接浚儀黃河遶其北盟臺拱其南

陳惠

敏考城

縣志

柘城黃河帶于後元明襟于前左高辛右葵邱

史鑑

柘城
縣志

謹按是郡一州八邑山川無扼塞之險城池
鮮金湯之固而適處乎中原四戰之域其形
勢實與徐汴相表裏論者或以地多平行無
足繫重不知固國不以山谿地固以人重也
前守宋國榮有言蒞斯土者使是地常取重
于天下亦可謂知其要矣

風俗

宋之水輕勁而清故其民簡易而好正

管子

其民猶

有先王遺風厚重多君子好稼穡惡衣食以致畜

臧

前漢書地理志

士有忠義之風民有仁厚之俗

李嵩歸德府志

奢靡漸熾游惰間出重名節敦道義君子所長健

訟門乖禮教細民之短

李嵩志

宋土平衍民風淳朴昔之君子多敦信義重廉耻

雅好經術通賓客有明之季一時名公卿相望而

雪苑文社遂與江左爭雄長

劉德昌商邱縣志

鹿邑人多質朴弗華忠義弗狡狴介弗貪黷直弗

屈務農桑故耻商賈重犯法故急賦稅尙儒術故

貴士人輕刀筆故賤胥吏

王堯曰
鹿邑志

夏邑民俗儉嗇簡訟少偷

舊府志

人尚齒序禮先官

長婚姻略財喪祭如制重本而輕末賤釋而貴儒

士絕市肆之飲民樂賦役之輸但習漸奢靡家鮮

積藏云

方立楨
夏邑志

永邑居中州東偏風氣漸南人多俊髦好儒雅雜

以遊戲有魏公子之風

周正紀永
城縣志

永城人性獷悍

舊府

志

虞城習尚類皆醕厚士大夫守禮法重名義朴質

爲規輕佻爲戒

蔣光祖虞城縣志

睢州人習工技自贍士勤誦讀取科第

舊府志

考城民性巧僞喜鬥訐邑昔多才江蔡諸宗尤著

舊府志

志

柘比屋農桑俗爲近古

開封府志

柘城爲邑最小規制

未備地率饑瘠多煮鹽自活士醢朴守禮無浮靡

習

舊府志

正月七日俗傳闕伯火正生辰男女羣集于闕伯

臺及火星廟進香喧逐竟日

商邱縣志

立春先日迎春次日擊牛競土泥竈啖蘿葡曰咬

春

虞城縣志

上元日賞燈放花十六日男子過橋母家迎女號

曰走百病

虞城志

正月十七日民間夜禁燈以便鼠嫁

虞城志

穀雨書呪畫像帖于壁柱用除蝎毒

虞城志

二月二日爲龍擡頭以青灰繞布宅舍云圍倉嫁

果木以爲多實

商邱志

十月一日民間焚紙衣墓祭曰送寒衣

虞城志

嫁娶之失時者輒于除夕行之以爲諸神不在百

無禁忌

商邱志

除夕舉炮柱邪橫一木名曰跌千斤

虞城志

湯司空鄉儀云有因送喪納婦者名曰扶婦此亦

中州之通弊宜革也

睢州志

謹按舊志風俗略而不書僅見一二語于他

志不知觀民風設教居賢德善俗良有司之

責也矧是郡人稟中和之氣厚重多君子史

稱其民猶有先王遺風誰謂今日之不古若

皇朝通志卷一百一十五
禮俗
哉國奢示儉國儉示禮庶幾比戶可封進于
淳古若乃州縣諸志載四時習尚如新年拜
節清明祭掃七夕乞巧中秋圓月之類大率
郡縣相同茲不復述間有與他郡縣異者亦
采風者所不遺云

歸德府志卷十一

建置略上 城池 官署

序曰城池以固疆圉言建置必先詳焉宋守舊府志止畧附地里不加稽考間因採輯劉令縣志復證以經傳旁蒐案牘先書郡城次及所屬州縣悉援古證今分條繫列商邱倚郭獨不書而閭郡之城池沿革于茲略備夫自古王公設險以守國承以大夫師長凡官府營建記于考工則官署宜書六經言養士之地魯有泮官鄭有鄉校教行俗成

端由學校則儒學宜書他若書院義學之設卽學
記之黨庠家塾也坊表之樹卽君陳所云表厥宅
里也以廣教育以旌善良皆得附書倉儲以待國
匪頒以周稽民食周禮遺人廩人委積特重以至
惠鮮鰥寡見美周書掩骼埋胔載稱月令凡皆仁
及無告郵政攸關尤不可以不書若夫古之馬政
悉本田功故魯僖公務農重穀而有駟牧之盛衛
文公務材訓農道商惠工敬教勸學授方任能而
有駟牝三千之多此于倉儲郵政之後附書驛遞

俾司牧者加之意爾

城池

府城春秋宋國城也其城東門曰揚門

左傳昭二十一年宋元公

以華向之亂公自揚門見公徒下而巡之漢時東

門猶曰揚門水經注梁孝王廣睢陽城七十里大

治官室東出揚州之門又東北門曰蒙門

左陽門卽睢陽東門也

年宋公及諸侯之大夫南門曰盧門

盟于蒙門之外是也

大宮之椽歸爲盧門之椽又昭二十一年華東南

氏居盧門以南里叛杜預曰睢陽有盧門亭

門曰埵澤門

卽孟子魯君所呼門也括地志宋東

興我役魯君西北門曰曹門

所呼當在此

北門曰桐門

左傳襄十年楚及鄭圍宋門于桐門又昭二十五年宋樂大心居桐門稱

桐門右師又哀二十六年宋景公無子畜公孫周之子得與啟景公卒啟立得夢啟北首而寢于盧

門之外已爲烏而集于其上味

加于南門而尾加于桐門是也又外城曰桑林門

左傳昭二十一年宋城舊鄘及桑林之門而守之

又邠門或曰宋郊外門宋武公時邠玁御皇父充

石獲長狄緣斯公以門賞邠漢孝王都于此初封

班使食其征謂之邠門是也

以地卑徙睢陽北征記城方三十七里南臨濊水卽睢凡

二十四門漢書孝王築東苑方三百餘里廣睢陽城七十里晉太康地記又云城方三十

里唐建中時亦爲宣武軍城城有三長慶三年宣

攻宋州陷南城刺史高承簡保北二城與賊戰却

之咸通十年徐賊龐勛襲攻宋州陷南城刺史鄭

處冲守北
城以拒賊

宋爲南京城城周十五里四十步東二

門南曰延和北曰昭仁西二門南曰順城北曰回

鑾南一門曰崇禮北一門曰靜安內爲宮城周二

里三百六十步門曰重熙頒慶京城中有隔城門

二東曰承慶西曰祥輝東有關城

東面外城也

周二十

五里八十三步東南北各有一門金之將亡也以

汴京危急謀出幸或言歸德四面皆水可以自保

旣而金主出頓歸德復走蔡州

商邱縣志

舊城周十二

里三百六十步明初少裁四分之一

舊歸德州志

宏治

十五年圯于水正德六年知州楊泰修園七里二分五釐共一千三百四丈二尺五寸高二丈五尺廣一丈三尺池深二丈濶五丈二尺嘉靖三十四年知府王爲重修又建西北門樓各一東南門樓二俱加修葺又建角樓四敵樓一十三警舖三十二三十七年巡撫章煥檄知府陳學夔包以磚而知府陳洪範羅復繼修之明末寇變折毀者十之三今知府張若愚重修門四東賓陽西埕澤南拱陽北拱辰水門二一在南門東知州王範建一在

南門西指揮梅旻建

舊府志

國朝康熙二十六年

知縣周宗義重修建門樓

商邱縣志

池距城丈餘濶五丈二尺深二丈城隍距城一里

許圍一十六里濶二丈址濶六丈一尺明嘉靖間

巡撫魏有本檄知州李應奎築邑人李嵩有記

商邱

縣志

明李嵩護城堤記

城故有護堤然庠薄環墮而近久之壞爲田嘉靖丙申河決大

潰蕩我郭廬幾壑我城有司率議遷城以辟乃地率水無可城者溺凡五年庚子春都御史餘姚淺齋魏公有本自大理被命撫河南時嵩待罪禁垣與魏公言堤障水便公慨然是之慨然趣所司以

從事堤四面環郭門周六里高視城之半厚倍之
上樹之柳不數月而工竣遂成巨障云於呼隄之
功用大矣哉往庚子之水也未有及隄議者子適
言之而魏公行之亡何水亦去閱二十稔視堤爲
長物行者徑之車者軌之兩穴其基薪敗其毛屬
以陶磚甃城故又斧斤其木濯濯盡矣乃今庚申
歲復大水舟楫由于樹杪平野悉爲津滙然竟賴
是堤以忘患否則如魚民何於呼我宋人其知魏
公之遺唐張巡睢陽城夜聞笛詩岩巖試一臨寇
騎俯城陰不辨

風塵色安知天地心門開邊月近戰

又守睢陽城

苦陣雲深亘夕更樓上遙聞橫笛音

詩接戰春來苦孤城日漸危合圍伴月暈分守刻
魚麗屢厭黃塵起時將白羽麾畏瘡猶出戰飲

血更登陴忠信應難敵賢貞自耿緯詩百戰無軍
不移無人報天子心計欲何施食孤城陷

寇塵爲傷多易子翻弔淺爲臣漫漫東流
水悠悠南陌人空思前事日向晚泪沾巾

明蔡汝

楠過歸德詩

古樹長堤護宋墟重臨故郡駐熊車
山川宛記封題處城戍悲聞戰伐餘

撫事魴魚今赤尾采詩鴻鴈未安居

吳國倫詩

是

常憐花竹架園路靡暇閒行畏簡書

宋中客勞歌迥自憐助苗風漸易伐木事猶傳土

豈安留骨民今望息肩郭門干樹柳悵望入秋烟

國朝宋犖登廢城詩

荒城亘數里形勢自森布秋
草碧參差閒雲莽迥互停車

陟其巔披榛得徐步白日忽西馳乾坤入薄暮行

潦接洪流歸人喧野渡遠村早稷收近岸寒鴉聚

縱覽感孤懷含悽倚獨樹往者全盛日茲城稱虎

踞城中十萬家歌舞不知數狂寇來縱橫蹂躪失

險固烽火照郊原通衢走狐兔遺鏃樵夫拾廢墅

山僧任回頭市井間人烟已非故淒涼二十年小

康猶未賦暫此息

海雁

鼓鼙遙天看飛鷺

查慎行歸德城外作二首

橋邊

路向東霜消日氣午怡融木棉吐子如脂白野柿

垂條似火紅驢背人簪雙鬢菊牛蹄塵漲四輪風

旗亭一醉誰同伴獨把吟鞭過宋中 寒烟衰草
入疎蕪 雎水流同戰血枯他日江淮論保障至今

祠廟具規模城連耗土秋多鼠樹倚神叢野 劉文
少狐惆悵繁臺歌管歇角聲吹落孝王都

蔚詩 中州舊蹟僅留名事去千年總繫情極目烟
荒脩竹院多時草沒小蒙城李唐忠烈驚心

重趙宋繁華過眼輕雪苑餘
風傳六子後來誰是出羣英

寧陵縣城又為寧城春秋宋地曰沙隨 左傳成十
六年公會

晉侯宋華元城圍五里高一丈五尺廣二丈門四
于沙隨是也

池深一丈濶八尺明嘉靖三十一年知縣石陞三

十五年知縣楊侃相繼重修萬歷年間鄉官呂坤

知縣李廷訓薛大中增修明末寇亂被毀署縣事

典史劉大中修補

舊府志

呂司寇坤修城周圍拓爲

六里有奇高三丈有餘全用磚包門制橋梁煥然
改觀工始于知縣李廷訓告成于知縣李大中又
著有守城書邑人遵爲成法城門四南曰文明北

曰鐘祥東曰延和西曰寶城樓四座水門二座俱
南向一在精忠廟前一在觀音寺前官水溝二道

各濶一丈餘池在城下介于城溝之間周圍七里

有奇濶十丈有奇

甯陵縣志

雍正六年知縣范章京以

甯陵城四面傾頽援盧氏縣分里認改派修之例

詳請重修

新增府志

謹按呂司寇論修城書云州縣重門高城深池豈爲如籬笆土墻遮人眼目分別內外哉千日之修備一日之難三年之勞爲千年之計也又按展城或問云不因防變則尺磚寸土盡屬虛文如云防變則鐵壁金城猶恐不固司寇之論雖專爲寧陵而發竊嘗謂城池關係至重凡在守國者皆宜倣昔賢之良策而爲未雨之綢繆焉

鹿邑縣城圍九里十三步高二丈廣一丈三尺門

五池深一丈濶八尺

舊府志

明洪武二年知縣韓璣

因元舊城增修起四門建樓東望仙南迎恩西通
濟北迎仙宣德六年知縣杜恩復于池外濬小池
週圍九里二百步深一丈濶一丈二尺天順五年

知縣蕭九成重修開西北門久閉嘉靖元年知縣

王朝塗改署門名北曰仰極東曰迎仙南曰嘉會

西曰和義西北曰歸孚隆慶六年知縣王冠砌城

以磚始設重門木橋崇正七年知縣韓友范改北

城外門西向濬隍整築女墻壬午被寇燬生員閻之瑄等倡修國朝順治十六年知縣陳王猷康熙十三年知縣牛樞相繼修築康熙二十六年知

縣呂士鷄增修

鹿邑縣志

夏邑縣城圍八里高一丈二尺廣一丈池深二丈濶八丈明正統十四年知縣周普修嘉靖十三年知縣滑參萬厯間知縣葛映斗崇正間知縣邊大順相繼重修舊府志正德辛未知縣張銳因流賊之警而恢廓之復置欄馬堞口設窩舖建四角樓築

護城堤闢四門東曰通濟西曰迎恩南曰迎薰北
曰懷遠 國朝康熙乙巳河決城陷知縣李天機
重修積年傾圮康熙三十七年知縣尙崇震增築
城堤周圍八里基濶三丈頂一丈五尺

夏邑縣志

永城縣城圍四里有奇高一丈三尺廣一丈門四
池深一丈濶倍之明景泰元年知縣王子齋重建

正德七年知縣喬岱修葺

舊府志

舊城圍一千一百

六十步正德中喬岱伐石爲基增築磚城加高廣
圍額其門東曰迎春西曰迎恩南曰朝陽北曰拱

極又于迎春門南開東小門每門建樓于上架橋于外築堞口一千二百八十處窩舖五十座明末知縣傅振鐸復接城三尺濶池丈餘建敵臺八座卽今城也 國朝順治十六年知縣程孔思捐修

康熙年間知縣周正紀重加修築

永城縣志

虞城縣城舊在縣南三里明嘉靖九年以河患改遷今所圍四里一十五步高一丈八尺廣一丈二尺池深一丈濶二丈五尺嘉靖三十二年知縣郭文顯增修明末司寇楊東明直指范良彥僉憲楊

春育范志完相繼修築易土爲磚

舊府志

城門四東

曰賓陽南曰薰風西曰望汴北曰拱辰明壬午歲爲流寇拆毀邑貢生陳遴彥等督率鄉民尙義者

完葺 國朝康熙三十年知縣李仲極倡義捐修

嗣于雍正八年知縣張元鑑重修池環城廣三丈

五尺深一丈四尺護城堤舊制低薄康熙十九年

主簿張元嘉加築高厚歲久衝壞乾隆二年知縣

張元鑑倡修邑人士助資爰復舊觀

虞城縣志

睢州城圍十里高二丈廣一丈門四池深一丈濶

三丈明正德間知州宋景重修嘉靖三十七年巡

撫都御史章煥暨兵備僉事王詠督築新城于南

關外磚內土門四

舊府志

州城門四南曰正德北曰

通鎮東曰永安西曰通汴巡撫章煥築新城其長
十有二里其高二丈有五尺其圍之步積而數之

三千八百有奇周圍包之以磚建門七南門三中

曰鳴鳳左曰左光右曰右光東門二正東曰朝陽

東北曰左翼西門曰翹翹小北門曰右翼新舊兩

城相連俗謂之鳳凰城周圍環之以池池之形勢

逐城而成當門有浮橋以便往來疏濬深廣日久

池湮城頽崇正四年奉命修築鑿新城本磚止加

補葺舊乃土城更甃以磚復增高數尺門樓敵臺

女墻羊馬墻屹然一新

程正性
睢州志

新城西小北門所

謂右翼門者舊志原無此門相傳一紳士爲園亭

之便倡議開之不知此地係黃河故道當未修新

城之先常通舟楫壬午黃河灌城卽從此入 國

朝順治七年累磚爲墻十六年水復決入城內民

房滄沒數千間康熙二十一年知州陳應富指俸

倡始邑士樂輸生員尙秉龍崔九峰楊聖修曹惟和分日省視工成堅厚秋水灌盈無復衝決之患矣水門在舊城東南隅舊城今塞其近城堤卽汴河舊址也原止城北一面明正統十年水浸城郭從生員黃琦策環城築堤 國朝康熙乙丑知州

馬世英重修

馬世英
睢州志

謹按湯文正公睢州志云吾省相連城形光州城形如呂字歸德形如同字睢州舊城正方新城橢圓兩城相連形如凸字又睢州志

城池論云大抵州城卑下堤外之地高于城內不下數丈堤潰則城必隨之此一城生靈所關不止廬舍葢藏而已守斯土者洵宜留意

考城縣城圍五里十三步高二丈六尺廣二丈門四池深一丈濶五尺明正統二年知縣鄭道修嘉靖二十一年知縣耿世慶三十八年知縣甯文光萬曆三年知縣馮尙相繼重修

舊府志

正德十五年

知縣段繡請于巡撫更增崇之門名各仍舊東曰

崇魯南曰望海西曰鎮行北曰拱極上各建樓外
浚濠深二丈濶四丈月城週迴二千九百九十五
步有竒墻高一丈一尺後萬曆十三年知縣杜志
晦重加修葺各易以新扁外東曰東夏咽喉南曰
中州雄鎮西曰西京藩衛北曰北門鎖鑰內東曰
葵邱旭日南曰葛堽晚翠西曰木鐸遐風北曰河
帶凝春然皆土城也至明季城圯知縣鄭養元設
法修築通易以磚 國朝康熙二十八年知縣何

如淮奉檄重修

考城縣志

柘城縣舊城圍十一里高二丈五尺濶一丈八尺
池深一丈濶二丈明嘉靖二十一年淪于水知縣
姜壽移建今所圍僅四里門四三十九年知縣康
周四十四年兵備董文采督知縣劉田重修萬曆
十一年知縣馮榛崇正九年知縣馬鳴玉復相繼

增修磚城 國朝順治十四年知縣張繹復修城

樓四弔橋四

舊府志

舊城門東曰瞻魯南曰永安西

曰仰京北曰長樂也嘉靖中睢州知州于文徵知
縣姜壽改南關而城之是爲新城爲門四東曰迎

皇德府志 卷十一
三
煦南曰嚮明西曰望汴北曰拱辰爲戍樓四水門

一 甃在南門之東
民望其開焉 公私衙署粗備矣 國朝順治

十四年知縣張緝復修康熙二十八年北城圯于

水知縣史鑑捐資修葺

柘城縣志

謹按柘城志云舊城雖廢遺址尙存土剛堅
固足禦水患况河水自西北來新城實賴以
保障新城土弱易頽卒不可守若更磚甃舊
城亦一勞永逸之計也

官署

府署在城東門內嘉靖二十四年知府蔡汝楠以州署改建堂曰保民堂之東曰經歷司西曰照磨所後爲後堂東爲恒積庫前列戒石亭六房儀門左右門左門之東爲架閣庫後堂後爲知府宅東爲同知宅順治十六年缺裁宅廢西爲通判宅東南爲推官宅經歷知事宅附于東知事久裁照磨檢校宅附于西檢校久裁初各宅修葺屋宇之費皆取辦九屬明知府羅敷以各廳諸役空月銀爲之官遷則籍藏什物以俟後者各屬無與焉儀門東

南爲土神祠西南爲司獄司前譙樓樹坊門外曰

承流宣化又其前曰中州重鎮二坊久廢

舊府志內

爲知府宅此外大堂

五間二堂

五間儀門

三間司獄司

三間

馬神廟

三間

六房廊

列大堂東西各一十二間

土神祠

三間孫天佑重修

糧捕通判署

在府署內西

經歷司署

在府署內東

稅課司署在府治大門東街北

新增府志

商虞通判署在劉家口乾隆十年商邱縣知縣繆

臻新建

新增府志

儀考通判署舊在考城縣治東南明季毀歷任皆

借居民房 國朝順治十八年通判李先魁重建

康熙十一年通判馮源濟增修考城縣志申明亭 旌

善亭俱在府治前知府王登進重修舊府志

陰陽學醫學俱在府治南舊府志

僧綱司在隆興寺舊府志

道紀司在城隍廟舊府志

北察院在府治東北久廢舊府志

南察院在府治前舊爲守備署屢加改建明季燬

國朝順治十年知縣劉之驥重建康熙八年知縣

祖文明重修

商邱縣志

布政分司在府治西南其西爲按察司中爲兵備

分司久廢 國朝康熙十七年知縣朱貴就故址

改建縣城隍廟

新增府志

舊歸德衛在府治西今廢

新增府志

叅將府故址卽今南察院 國朝復設叅將移駐

城東南隅民居今名兵街中軍守備署在其後

商邱

縣志

國朝侯方域重修演武廳事記

某旣鎮歸之五年日勉循厥職曠弛

是懼乃按其部伍而進之曰講武大事也而無其所可乎歸舊有廳軍府將先鳩財焉爾其各量乃力爲之部以告其將伍以告其士皆曰諾于是庀器用均作役立期會閩旬而成嘗攷歸在前代初爲州豫州故天下之腹心而歸又豫省之腹心也內地相仍不特設兵戍歸有軍衛沿農戰空名而已積安二百餘年至隆慶間邑人師尙詔叛乃改爲郡置兵立叅將領之當是時豫州無統師專閫之權爲重後小安無事漸以殺久之愈益以爲無事遂廢其官萬歷末又數十年矣鄒滕妖人徐鴻儒變典復置兵以守備爲將葢不侔于昔云歸人父老爲某言復設兵後妖變旋平天下輕武所置守備者曰趨踰服屬于卿大夫之家不復坐廳事廳事雖設爲樵牧塲間歲乃借于有司以較士按部使者至則守備拱立拜跪其下益踟曲其得稍稍具威儀者僅霜降揚兵一升其堂而已如此者二十年將甲兵寡寇氛日熾歸人乃欲請于朝復設叅將而破亡不可待矣今日稽明舊建官某實

承乏東寇不靖潛逸我疆賴國家威靈數殄滅之
五歲于茲日警武備也嗚呼歸故所稱爲腹心內
地未幾而于明季爲四戰未幾而人叛圖尤悄悄
戒伏莽焉常變安危之相倚伏豈有定哉然焉知
後之人不更積輕而廢之亦如昔日者耶夫天下
無事相承廢而修之嘗難輕而廢之甚易百爾君
子敬共爾位某之責在講武
而修廳事者乃其位也故記

商邱縣署在城西南隅明嘉靖二十四年知縣曾

騰鳳因舊隆興寺改建崇正十五年流寇破宋

遂遭焚燬後皆寓于民居 國朝順治七年知

縣李守功于舊治重建十一年知縣劉之驥增

修康熙三十八年知縣劉德昌復加修治煥然

改觀有大門三間儀門三間大堂五間庫樓一間在庫

房三間在退食堂三間在退食縣丞

宅在知縣主簿宅在知縣典史宅在縣丞六房

廊在大堂前戒石亭在大吏解在土地迎賓館

門在儀土地祠在儀獄在儀旌善亭在大門申

明亭在大門馬廐在西

丁家道口巡檢司在城北三十里今廢商邱

濟陽公館在濟陽鎮今廢商邱

民教場在西隄外稍南商邱

軍教場在外隄西南門內

商邱縣志

甯陵縣署在城內萬壽街東明正德四年知縣吉

容重建有大堂

知縣楊輔重建

鑾駕庫

在大堂東今廢

庫樓二

知縣熊秉元修

什物庫

三間

贊政廳

三間

後堂

三間

間在

書房

三間

六房廊

知縣顧濤重修

典史宅

典史程鵬重修

戒石坊

知縣梁景程重修

照壁

一座

鐘樓

三間

槐保甲房

三間

快手房

三間

申明亭

一間

知縣梁景程重修

寅賓館

熊秉元建

土地祠

在儀門東

獄門

在大門外

善亭

在大門外

旌

在儀門內

旌

陰陽學醫學俱在縣治前今廢

舊府志

察院行署在儒學東 國朝順治十年知縣任

天祚重修

甯陵縣志

布政司在東大街北今廢

甯陵縣志

按察司在東大街北有址存改爲養馬之所

甯陵

縣志

柳河集公館在柳河集之北廢址猶存

甯陵縣志

桃園關巡檢司在集北久廢

甯陵縣志

教場在甯陵縣南門外

舊府志

鹿邑縣署在西門內明洪武二年知縣韓獻建嘉

靖二十五年知縣夏寶重修 國朝順治六年

知縣閔三元相繼重修有大堂五間琴堂三間贊政

廳三間縣退廳三間三堂三間知縣呂士架閣

戒石亭一座儀門三間獄儀門外土地祠三間馬神廟

三寅賓館三間馬廩一所照壁一座旌善亭大門外東

元重申明亭大門外西知縣譙樓縣治前鼓樓

知縣王政鐘樓知縣王政碑樓知縣呂士主簿

衙縣堂東典史衙縣堂西吏書房列縣堂里長

分署

在縣後東西

陰陽學縣治東今廢

鹿邑縣志

僧會司縣治南萬壽寺

鹿邑縣志

道會司縣治西北真武廟今廢

鹿邑縣志

府館在縣治東今廢

鹿邑縣志

行署布政分司按察分司俱在縣後東今廢

舊府志

志

察院在儒學東久廢 國朝康熙二十九年知

縣呂士鷄重修以供

龍亭

新增府志

教場舊在鹿邑城西北明萬曆年知縣劉一瀾

改建東堤外

舊府志

夏邑縣署舊在城內西北隅元至大己酉圯于水

明洪武三年主簿紀懋重建四年知縣石原吉

加修嗣後知縣周普宋傑鄭相繼修規制聿新

天啓末知縣馬希周重整有琴堂三間大門三間寅

賓館三間土地祠館東三間馬快房大門東民壯房大門西

皂隸房三間戒石亭堂前有碑儀門三間後廳三間三堂知縣

張所志修幕廳三間官庫堂西一間架閣庫堂西六房六間東西各

承發司

三間

倉庫房

一間

鋪長司

一間

知縣宅

廳後知縣祖業

興

內宅樓

五間

縣丞宅

今廢

主簿宅

今廢

典史宅

堂西獄

儀門

旌善亭

鼓樓東

申明亭

旌善亭東

布政分司按察分司舊志俱在縣治東南今廢

夏邑縣志

府館布政分司南嘉靖間知縣卽按察分司舊

址重修今廢

夏邑縣志

驛丞宅在會亭驛中門內西南

夏邑縣志

韓家道口公館在集東南北街其基址邑士王

軌捐輸當道嘉其好義帖免差役

夏邑縣志

胡家橋公館在集南北街

夏邑縣志

陰陽學醫學舊在縣治南久廢嘉靖間知縣鄭

相重建于縣治東

夏邑縣志

教場在夏邑縣西門外

舊府志

永城縣署在北門內西漢創建金升爲州廳字仍

舊金末毀廢明洪武三年主簿趙珪重修 國

朝康熙年間知縣錢上安重修六房廊易草爲

瓦有正廳

三間知縣喬岱重修

穿堂

在正廳後今廢

後廳

喬岱改建幕

廳三官庫東西各一間六房廊東西各三間承發司一間架

閣庫一間御箴亭在甬道中吏舍在儀門外儀門三間獄門在儀門內

土地祠在儀門外東寅賓館在儀門西鼓樓知縣周正申紀重修

明亭在大門外東旌善亭在大門外東宣化坊在大門南知縣

宅在正廳北宅後舊有縣丞宅在正廳東北今廢改入知縣宅

主簿宅在廳西北久裁今改驛號典史宅在正廳東南

布政分司在縣治南按察分司在縣治東南今

廢永城縣志

稅課司今改韓公祠永城縣志

陰陽學醫學俱在縣治東南今廢舊府志

僧會司在縣城外東北舊府志

教場在城北門外舊府志

虞城縣署在城內東北舊治元末兵燬明洪武元

年卽遺址修復嘉靖九年遷城知縣黃鏞勅建

嗣是知縣汪瑞高位黃虎臣韓原性胡宗溇相

繼增修 國朝知縣張時昌史鵬復加鼎新乾

隆三年知縣張元鑑重葺有牧愛堂今改忠愛堂幕

廳在堂西庫樓堂之東景李堂在堂後知縣宅在堂後六

房廊

堂東西

戒石亭

大堂前

土地祠

儀門東

寅賓館

儀門

東

獄儀門內

譙樓

大門上

申明亭

三間

旌善亭

三間

典史

宅

在縣大堂西

縣丞署自明嘉靖年裁缺其舊署不可考今康

熙二十五年復設專管河務遂于濱河賃民房

居住

虞城縣志

主簿舊宅在縣大堂東以專管河務亦于濱河

賃民房居住

虞城縣志

僧會司道會司俱縣治東

舊府志

布政分司按察分司俱在縣治西南府館舊在

城隍廟西今俱廢

舊府志

舊縣治有陰陽學在申明亭東醫學在旌善亭

西今俱廢

虞城縣志

睢州署舊在城內正北洪武初知州楊時敏建正

統五年知州仲廣重修嗣後王珣徐滋于文徵

相繼重修

舊府志

壬午之亂春火于兵秋淪于水

國朝順治辛卯始買李氏宅爲衙門僅有廳事

三間兩廂六間大門二門六間廨內堂樓三間

東西樓六間其後屢加修葺然後延賓有館收糧有房胥吏有舍有觀我堂以爲退息之所有穿廊有後堂以爲政優讀書之地其他庖廡庫廩粗具而已此父老以爲雖居城之中央足以臨蒞一州終不若舊治規模位置出于天然也

後之人尙思所以圖之

睢州志

判官廨在奎樓東

睢州志

吏目廨在火神廟西獄在衙西街南知州馬世

英移建

睢州志

歸德府志 卷十一
陰陽學在州治東醫學在州治西舊府志

僧正司在興國寺內舊府志

察院布政分司按察分司府館俱在新城內今

爲廢署舊府志

睢陽衛署在裏臺之陽水南門前睢州志

教場在東門外舊府志

考城縣署在城內正北明洪武初建嘉靖間知縣

章裴重修明季毀于寇 國朝順治八年知縣

劉愈竒重建有知縣宅在大堂後公廉堂卽大堂戒石

亭在大儀門三角門三庫樓在大吏書房東西

間

土地祠在儀

賓館

署縣亭廳

獄在儀門西旌善

亭

在大申明亭

在大主簿宅

在大堂東久廢典

史宅

在大堂西久廢今借民房居

察院行署在縣治西今爲民居止有縣治西小

察院一處

考城縣志

布政分司在縣治東今爲民居

考城縣志

府館在縣治西南今改爲常平倉

考城縣志

陰陽學醫學列縣治左右

舊府志

僧會司舊在葛堀寺後移于縣治西南觀音寺

考城
縣志

道會司在縣治西南城隍廟

考城
縣志

演武場舊在縣西北 國朝順治十年知縣劉

愈竒移在城西南郭

考城
縣志

柘城縣署在南門內洪武元年知縣王智建舊城

內嘉靖中淪于水知縣姜壽徙建今地

舊府
志

其

制外爲照壁爲大門爲儀門旁爲角門中爲御
箴亭爲愛民堂後爲中堂東爲幕廳爲六房爲

公解前左爲土地祠寅賓館後爲知縣宅在大堂後

典史宅大堂左旌善亭大堂前申明亭大堂前

陰陽學在縣治東柘城縣志

醫學在縣治西柘城縣志

僧會司在白塔寺舊府志

道會司舊在城隍廟今改在三清觀新增府志

舊城有布政司按察司府館嗣廢于水嘉靖三

十三年知縣姜壽改建行署于新城市物街外

柘城

縣志

謹按書有云惟厥攸居政事惟醕故宅之公
府以示貴崇之堂階以示尊也今攷郡屬如
鹿邑新設縣丞未有丞署典史舊宅亦壞賃
居民房虞城丞署竟莫攷其故處主簿舊宅
雖存亦廢俱借民房以爲棲止其何以肅觀
瞻宦游斯土者所宜亟謀治所焉

歸德府志卷十二

建置略中 儒學

儒學

書院

社學俱附見

府儒學在縣治東卽宋應天書院大中祥符年建爲
南京國子監屢經兵燬明爲儒學洪武六年知州
段嗣輝創建宣德天順間知州李志蔣魁相繼增
修宏治中圯于水遷今地正德初知州劉信建明
倫堂五楹左右齋舍各六十楹前爲儀門三楹大
門三楹其後爲饌堂五楹又後爲教官宅嘉靖初

詔建啓聖祠

國朝雍正年改爲崇聖祠

敬一亭二十一年分守

叅議王崇檄知州李應奎修葺之二十四年爲府

學三十四年知府王有爲三十八年知府陳洪範

重修

舊府志

明末知府薛玉衡修明倫堂

國朝乾

隆十六年知府陳錫輅重修

新增府志

明侯恪重修歸德府學明倫堂記

崇正元年天子神聖御極首

誅逆闖臣魏忠賢等一時日月重朗乾坤更新遂大計天下吏較其賢否而黜陟之於是郡大夫薛公以治行第一舉卓異錫宴賞有差俾還本郡天子憫然念德教之不專不可以致治乃命所司以久任責成功薛公來屬其俊士而告之曰天子俾余久守爾士爾士自微子建學以來風俗醇厚教

化修明且吾夫子習禮之遺蹟在焉禮明則分定
分定則教行故往者逆祠遍天下而爾郡守禮抗
不從也乃者學堂告頽育才無地余恐彝倫之不
明教化之不興終爲守土者羞其議所以修之于
是鳩工庀材出俸金若干及前守丹陽湯公道衡
損貲贖鍰若干佐之重毫翼日畫棟承雲人工稱
輪奐之美庶士興威儀之嘆修旣成薛公屬余記
其事余嘆曰卓哉薛公之修茲堂乎先王之治比
閭族黨莫不有學皆所以明人倫教綱常也人倫
旣明綱常無斃故其成也道德同宗本末相應上
有淳厚之求而下無越軼之行未始有戾焉往者
逆璫擅政濁亂天常于是有五拜以爲容九干以
爲頌者而君臣之倫廢于是有稱男以獻媚作孫
以取悅者而父子之倫乖于是有以臣妾爲蹇修
議鷺鷥于丹穴者而夫婦之倫傷于是有結逆孽
于棠棣依奧援如鵲鴿者而兄弟之倫薄于是有
見利而援肺肝如平生遇害而下井石相排擠者
而朋友之倫壞此其人皆素稱俊士自鄉而貢之

王家者豈其不明于道耶上之人無所以提醒其
心而勢利相搏憂患相乘故綱常之念頓輕漸漸
漸滅以幾于盡耳大夫慨然于此而重修此堂以
明人倫人倫明于上小民親于下豈獨士無越思
雖比屋可封也昔唐安史之亂張巡許遠守睢陽
爲江惟保障迨使郭李諸將得一意北方以成至
德之功抑甯師武臣力足相抗哉無亦惟是君臣
大義固結者素故數萬人雖死不偷耳然則此堂
之修雖與此倫並不朽可也公諱玉衡原名三國
台字縉符別號高塵已未會魁浙之定海人

朝陳錫輅重修儒學記

國家重熙累洽海宇乂安
八埏之內守土者罔不崇

飾學官俾翹秀之士修容于禮園翱翔乎書圃况
在微子受封之地爲至聖源流所自者哉郡學自
前代迄今屢經興替

皇帝御宇之十有五年余奉簡命從河南郡調

守是邦下車之後肅謁聖廟顧見丹堊黝昧梁
桷彫剝懼不足以揭虔妥靈匠成翹秀思有以重

新之退計所費非數百緡不濟乃首捐薄俸而郡人之好義者各輸金襄事因是擇吉鳩工圮者整之缺者補之漫漶者彩煥之始于辛未秋迄于壬申春凡數閱月而告竣嚴嚴翼翼烘赫有煒矣夫學校者人材所從出其間興替如山谷之出雲焉雲之厚薄視乎山之崇卑人材之多寡視乎學校之盛衰而已歸郡九庠科名甲于中土而郡庠弁之以先師禮教之留遺而重以弦歌之陶淑則爲功較易也自茲以往將見霞蔚雲蒸蛟騰鳳起人材之興其未有艾乎

宋應天書院在舊城州治東宋大中祥符三年邑

士曹誠建學舍百五十楹聚書千五百卷招明經

義者講習其中有司以聞賜額應天書院久廢

商邱

縣志宋有勅賜碑在舊城內嘉靖中御史蔡某以社

學改建今廢

舊府志

宋范文正講院在府學之東有大門有二門有講

堂有後軒中有文正公祠有文昌閣有藏書樓樓

下有廳房有向學西門樓東西有號房周圍有磚

墻明萬曆三十九年知府鄭三俊重建

舊府志按商邱縣

志云萬曆二十九年未知孰是

國朝康熙十三年知府閔子奇重

修今爲郡義學

商邱縣志

國朝侯方域重修書院碑記

順治八年燕山王公來守歸德首下教博

士弟子問以郡之政所宜先者博士弟子對曰歸有范文正公書院先太守鄭公嘗沿其意而創大

之以儲歸之材居有號舍贍有田課試有約行之
既久歸之名公鉅卿接踵其間出爲當世用不絕
而士風亦群感動淬厲烝烝以變今雖廢而人之
謳吟思慕鄭公之澤者數十年不衰竊以爲佐朝
廷興道育賢郡國之政宜莫此爲大公曰博士弟
子言是凡書院之爲舍者幾楹其侵而居之者幾
何家資餽之田幾區其官守因而入其租稅者幾
何年今坐何所其試士之期月幾日條約之議詳
而要者幾何具趣所司各以聞以付郡博士收而
掌焉蓋自鄭公去而書院之廢垂四十年公一朝
復之嗚呼偉矣博士弟子曰是不可以無記謹按
書院之設始于宋范文正公公爲諸生卽以天下
爲已任其後叅大政不久未竟厥施然所措置率
宏以遠卽如在歸而歸有書院其隨地收拾人才
之意是何可一日廢也范公往而繼之來守者不
能識其意亦浸以沒滅矣歷宋而元而明至萬歷
間始克有鄭公再舉行之當時之人親被鄭公之
澤至于今其遺老有能言鄭公時事者猶過書院

仰首歛獻不忍輒去豈人情固習近而遺遠耶抑所以繼范公之遺緒于兵火喪亂之餘久而不墜者實鄭公力也然則鄭公之遺緒又豈不待後之人哉夫天下法制代有更變惟學校弦誦之事建國者卒無以易也書院之設與學校相表裏王之化之本而菁莪棫樸之盛所自出是誠不可一日廢乃自范文正公以來千百餘年而其間之創而建而興者僅公繼鄭公而三然而政之舉廢存亡豈不視乎其人歟倘無以垂永久則何以告于後之人俾克守之公曰博士弟子言是其勒石爲碑而屬余爲之記嗚呼余之望于守是邦者久矣其何敢辭

陳錫輅題文正書院

贈劉豹君作

乍從講幄啓壇談吐紛綸見古歡
重厚人情還樸茂輕清水性少波瀾

衣冠接座如雲擁風雨留賓脫粟餐

劉文蔚詩

中州

太守尙慚同叔遠雅才休說嗣音難
文雅地院以范公留造土原多術藏書尙有樓
性真無代謝風月嬾春秋慚愧稽山客經年共討求

查岐昌詩

古郭迷原廟公名尙宋都傳經先問易厲節始爲儒異日尊胡瑗當年重晏殊

至今留講院

賢蹟竝中吳

商邱縣儒學在北門內四牌樓西明萬歷元年知

縣何希周建明倫堂

三間

東西號房

各五間

教諭宅在

明倫堂東北訓導宅在明倫堂後

商邱縣志

明沈鯉新建商邱縣儒學記

嘉靖乙巳歸德旣升州爲府庠稱府庠矣

廼商邱爲附屬首邑而未遑庠序之事也蓋闕典

云萬歷癸酉巡撫都御史朱公綱巡按御史褚公

鉄疏學使楊公周公議以請詔曰可其興學置博

士弟子如制于是邑始除文學博士二而繼周督

學者衷公亦始置學官弟子布公令下焉明年二

月郡太守鄭公旻邑何侯希周始卜築郡治之乾

而賴公庭檜繼鄭爲守以乙亥八月工成釋菜蓋爲文廟五楹學之堂三楹也其餘凡廟學宜有者一切始制而又爲文昌閣五楹于堂之直北咸闕焉恤焉與郡校甲乙稱一方首善無闕矣後五歲庚辰邑博士張君庭槐許君汝臯率其弟子謁余言記之且曰維今守鄉公別駕周公殷公司理陳公方雅興文治而今尹呂侯乾健實修明政教克績厥功是不可弗紀也於是邑人鯉紀之而又與茲庠之游者計之曰嗟乎盛矣哉吾鄉以府庠益州邑庠益府也蓋士稱濟濟焉亦一時俎豆之林也盛矣哉抑子私計之此猶適養士之始也惟士才有羸詘則論其卒也亦在士不在上憶昔日父老有言曰吾鄉自成宏以前間闕子弟不願爲諸生章甫也學使者行縣至則有司常趣之其稍能通章句以上者輒已預以文辭科第絕少也乃其時之以士稱者則固居善俗出適用在鄉鄉重在國國重也人弗敢以文辭科第少之也此始詘而卒以羸也迨後人文日益佔嗶嗶吾連東西家且

斌斌藻續之工也而上始操尺寸嚴彙黍以限之
猶策名科第者踵相接以方昔何盛也及所謂適
用善俗者則不能無遜謝亦安敢謂多也此始羸
而卒以詘也夫養士亦多寡何常也昔者平原勝
之以十九人如楚也蓋不能行者三千焉是三千
人者卒未嘗養也既遂以一言定從而十九人錄
錄焉是十九人者亦未嘗養也而所養惟一遂故
士才有羸詘則論其卒也夫養士豈專在上也今
國家毓才如天地非如勝及區區勝之士也乃所
謂士品者予得私槩之蓋有能明經飭行適用善
俗者是吾儒之以遂稱也其上也而厘厘工藻續
媒科名無裨實用者是十九人與不能行者之類
也其下也是兩者猶莛于楹也則士宜何處焉夫
瘁心力而藻續之工科名之媒至難也率其常以
明經飭行適用善俗至易也上能奮所難而羸之
乃甘心以詘于所易抑何其不權也卽有可諉者
曰士適用以遇合以才而明經飭行以厚鄉俗猶
與彼無裨實用者相萬也謹禦之而甘自詘也乃

復有俗士者不之察第見士有辭與冕而衣裳者則槩曰人才人才云又何其鄙也諸此者俱能惑士嚮而移之故士欲卒之贏則又宜慎始也或云國家業毓才如天地則廣儲而約以取之日始曰卒何求之備也噫不然廣儲約取者上所以待士厚道也士亦以自處則薄也不覩夫匠氏乎夫匠氏之操斤以遊于窮谷也得一章已不勝自多也入豫章之林而所求一負則咄嗟少之何者儲之廣則求之備也夫自茲庠設而吾鄉豫章矣士亦何以稱匠氏昔有稱商子者力無敵乎天下而不以力聞蓋成宏以前亦大都如此矣士欲有以稱匠氏其亦吾先民是程哉故特與茲庠之游者計之也是役也董之者潘簿一龍後先與事者貳守魏君宗方令顧侯知類也而督學楊公者諱俊民河中人周公諱之屏湘潭

人裴公諱貞吉豫章人

社學舊隨鄉建置後稍廢明嘉靖初知州王侑建

之象賢祠西又嘉靖十年巡按御史蔡襲改爲應
天書院後廢 國朝康熙十九年知縣朱衣貴重
立于縣前二程夫子祠內後知縣趙申喬更爲恢
廓題曰師程講院祀二夫子併修文昌祠魁星樓
以翼泮壁知縣劉德昌復加修治今仍爲縣義學

商邱
縣志

甯陵縣儒學在縣治後舊在縣治西南明成化十
四年圯于水知縣金璽建正德十四年巡按王以
旂檄縣增修明末寇燬 國朝順治初知縣侯國

泰邑士李若星等重修

舊府志

順治六年生員解正

倫解全倫母張氏輸資助修文廟勒碑于戟門下

康熙五十七年歲貢路建義捐金重修孔毓崑妻

張氏助修兩廡雍正八年知縣常衍田松齡相繼

增葺乾隆十年知縣梁景程重修明倫堂

新增府志

元辛明遠重修廟學碑銘

昔李遼表請修孔子廟增立庠序曰事有如賒

而實急者此之謂也其知本之言哉粵自古昔未嘗不以興學治廢學亂者皇元列聖相承必勅有司興學育才至元丙子十月脫歡溥化君來監是邑觀大成殿規制未宏屋宇陋而不具有蹙于心謀于縣尹王君證議以克協明年二月以大成門前垣摧圮徹而修之且爲立櫺星門于舊講堂之

北構屋兩間爲函丈周以木榻起西齋新東齋翼
焉未幾王君以病去職後尹未至獨終其業市陶
器二百事體用無乏先是郭北沙河絕流兩壩地
可耕者若干百畝縣以廩學白府從之民雖承佃
租實隱沒至是君覈實之悉令平輸莫敢欺後文
學中山王秉直進諸生諗曰監縣君之于廟學也
割俸先衆市財傭工夙夜恪勤焦勞匪懈其用心
賢矣哉盍具顛末以告後令各出楮券有差合得
千五百緡載礪貞石以愚悉其實懇文焉旣不獲
讓緬惟三代治化所以隆風俗美後世而不能及
者以明倫之術周且密也舍是而求治未之或聞
東漢人材風俗接乎三代之盛由光武明章篤于
經術賓延儒雅風靡波屬人知禮義崇尚名節延
及末世以魏武之雄鷲加有大功竊窺漢鼎莫之
能致然而終其身而不敢廢置檢于風俗畏名義
而自抑也由是觀之學校人材之本治化之源風
俗之機然非有志于先王悠久之治者不知其爲
實急也子賤宰單父得聖人之道夫子惜其所治

者小君修學官傳誨人之基君子亦惜其所治者
小也雖然擴而充之功可量哉君蒙古氏字慎之
曹州楚丘人副樞毅公孫以父資廕是職讀書篤
行爲政有廉稱云銘曰於皇上帝生我民斯匪聖
罔教靡德不爲天生睿知治而教之爰宗元聖巍
官晬儀內自都邑外達郊圻星列碁布建學立師
惟此泮官歲遠日隳數狹令會賢監致茲爰龜爰
筮爰同謀咨乃立神門有伉其巍赫赫宏敞榱桷
雲垂樞星蠢蠢華猗官離流精明月疇競崇卑渠
渠者堂如翬斯飛學徒濟濟鼓篋其依嗟嗟士子
遊息有歸豈弟君子毓爾攸宜爾公
爾侯惟學之基悠悠後來徵此銘辭

寧城書院在縣治東乾隆七年知縣梁景程倡捐
興建講堂及諸房宇置地一頃一十畝又捐銀二
百五十兩存鹽典生息給師生膏火之資景程復

自爲碑文以記之文不備錄

新增府志

謹按甯陵縣舊志載有社學十二處大率乍興乍廢未有加意作人實心設教者梁令能捐俸創興書院于風塵俗吏中可以爲難矣夫甯陵本呂新吾講學之地也嘗見呂公社學要略著有五禁十戒指點最爲切近凡在書院義學皆宜書一通于座右

鹿邑縣儒學在縣治東明洪武三年知縣韓璵建嘉靖二十五年知縣夏寶重修

舊府志

國朝順治六

年知縣閔三元重修大成殿康熙二十五年知縣
呂士鷄增葺康熙四十年知縣謝乃果復修正殿
旁爲東西廡前爲戟門門東爲名宦祠門西爲鄉
賢祠又前爲泮池池之南有坊坊之右爲忠義祠
坊之左爲黌門又南爲櫺星門正殿東北舊爲啓
聖宮乾隆元年易名崇聖祠廟外東偏爲節烈祠

知縣張修五建

新增
府志

國朝楊六德閔公建學宮碑記

吾邑學宮其在明
朝創建者有人修

理者有人咸勒之金石載之邑乘王午之變學官
宮解析爲瓦礫蕩爲邱墟每朔望瞻拜及春秋享

祀掃地布茲從事而已行道之人無不嘯唏嗟嘆
使我心惻焉公于順治五年五月來蒞茲土也甫
下車卽振肅紀綱維新百度念臨民莫要于官署
而教士須先乎學官但官帑如洗旣無可支之錢
糧而里甲初集又無堪派之丁徭無米之炊賢者
難之公權宜設處捐小民之贖鍰爲學宮之公費
且鳩工庀材規畫井然吏不爲奸民不知役而大
功告成未幾而聖殿建兩廡立廟貌重光矣未幾
而名宦鄉賢修君子攸躋矣未幾而戟門坊壁有
伉將將矣嗣是朔望瞻拜春秋享祭博碩肥腩神
罔怨恫矣嗣是而明倫堂成學博弟子員以時習
肄其中泮池之內橋門之外觀者如堵向之唏噓
嗟嘆者今皆舉手稱慶以爲數十年之廢者脩墜
者舉矣嗣是而邑之俊秀子弟魁于鄉薦捷于南
宮者科不乏人矣噫宦蹟如公可以尸祝而俎豆
之矣其以卓異行取而超遷爲晉州刺史也迄今
更幾歲鳧鳥雖飛遺愛如新望官署而肅肅八學
宮而雍雍其經始之勞教育之澤不可忘也爰記

臨德府志 卷十二
之以待後之
永諸金石者

真源書院在城內東北隅昇仙臺側康熙二十七

年知縣呂士鷄創建並自爲記文不錄

新增府志

夏邑縣儒學在縣治東南金大定間縣令王德彰

建元末兵燬明洪武三年主簿紀懋重建宣德以

後知縣王衡周普孫澤王志宋傑相繼修葺嘉靖

四年知縣劉宗和重修四十三年推官羅清霄檄

知縣劉濬增修

舊府志

明末燬于火

國朝知縣尙

崇震殫力重建

夏邑縣志

崇正書院在慈聖寺西嘉靖二十五年知縣鄭相

建今廢

新增府志

社學在縣治西南卽舊陰陽學惠民藥局故址嘉

靖中知縣鄭相改建今廢

夏邑縣志

永城縣儒學在縣治西南金時升爲州學金季兵

燬元至元初邑民屈瑄舉其廢延祐間縣尹王慶

攷其成未幾復燬明洪武三年主簿趙珪重建正

德間縣丞張繼祿嘉靖四年知縣陳廷瓚相繼修

葺萬曆七年知縣鄭東昇重修四十五年知縣石

上箴復修明季燬于寇 國朝順治十一年知縣

楊祖南吳熠重修康熙二十三年知縣周正紀補

葺永城

縣志

元曹元用廟碑記

大哉聖人之道洋洋乎盈天下久而彌盛遠而愈彰充九州以

溥海表人誦其書賢者粹其德能者通其才智者普其明身以之正家以之齊國以之理天下以之而治平綱常所以立彝倫所以叙仁義所以興俗化所以美大哉皆吾夫子力也如天地之育萬物飛潛動植洪纖妍醜各盡其妙舉世滔滔由之而知其所以然者寡嗚呼曩微吾夫子則人道熄矣萬物其能昌天地其能位乎此所以王服而膺天下之祀亘萬古如一日貴賤尊卑莫不顛顛然恪奉祀事宛若比肩游夏而親炙之者夫豈偶然而已哉永城昔爲亳之屬縣金源氏升爲永州逮聖

元則爲縣仍故而創隸歸德永城孔子廟在縣治南一里許燬于金後悉莽爲榛棘之墟至元初邑人屈瑄卽故址爲正殿四楹兩廡十二楹今四十餘載矣摧圯日甚殆無以妥聖靈前尙書省掾古伯景初于延祐三年夏由鹿邑縣監調承事郎監永城縣蒞政之始毅然以建學官爲先遂暨主簿董思政道卿以禮諭好義之家輸財越明年夏西鄆王慶伯善自靜海丞遷歸遂興築猶懼所費或匱市財傭工搏大成殿六楹東西廡三楹作聖賢洎諸大儒像葺講堂而新之匝以修垣凡五閭月落成雄遠偉麗于是臺勿感慕文風爲之一變嘻而今而後吾見其政醅訟息禮義昭而人才興矣其所補豈淺淺耶典史冀安教諭崔子用輩宜力爲多以碑記請故撮其實而記之

澮濱書院在縣南二十五里鄧橋集澮河之濱元

縣尹張思立刱建

舊府志

至正末兵亂被燬科爲民

業明嘉靖中鄉者王繼真與弟繼先繼宗捐資贖

買舊基同義民劉陽蘇暹等重建樹碑今廢

永城縣志

太邱書院係舊太邱驛地後驛移西關外隆慶二

年邑令左思明卽其址刵建書院仍名太邱起講

堂傍列書舍邑人李廕岳記其事生員李支奕旒

地四頃並庄一處供書院課士公費坐落馬收集

至 國朝此地不知歸于何處留心義學者盍清

理之

新增府志

社學在城一在各鄉十有一

舊府志

今俱廢

虞城縣儒學在縣治西南明嘉靖九年自舊城遷
知縣黃鏞建後十年知縣汪瑞教諭左序署縣事
高位重建萬曆元年知縣韓原性教諭劉儒修葺

舊府志

萬曆三十四年知縣王納言邑人楊東明約

士民協力重修東教諭宅西訓導宅中爲大成殿
兩翼爲東西廡前爲戟門爲泮池又其前爲櫺星

門迨明末兵燹頽壞 國朝順治庚寅教諭梁祚

隆訓導李廷獻集邑士重修未幾復圯康熙二十

三年知縣李銓重修雍正十一年知縣張元鑑倡

皇德府志 卷十二
修邑紳許士正等協力董成

新增府志

社學舊在東嶽廟側迤西街口北今廢

虞城縣志

義學康熙二十四年於啓聖宮東設立四間康熙

二十八年奉巡按閻公檄城內四鄉各設義學後

浸廢康熙四十年知縣程本節于西關路北建房

延師訓士雍正十一年知縣張元鑑因舊址增葺

又置城東地四十畝濱河地一頃以爲義學久遠

之計

虞城縣志

明楊東明義學記

天下何以太平得其人而理矣
人才何以衆多得其教而興矣

是故賢才天下之司命而教化賢士之楷模此治
理之要機而憂世者惡可不汲汲講也萬歷丙申
間中州薦饑閭閻子弟率放棄不學余慨然念曰
此輩收之則有造有德棄之則愈趨愈下天生斯
民使先知覺後知責將在予乎乃闕隙地爲塾延
良士爲師郡邑子弟教之甫逾月而四境雲集比
逾年而隣境響應于是一不能容而益之再再不
能容而益之三余乃拮据歲入貢三師之費又慮
辭章之習非所以造士也乃爲提其宗旨詳其科
條合文行以並修兼內外而交養務令知聖人可
學而至而學必以至聖爲期薰陶既久乎化漸深
文旣開通性亦馴雅余乃喟然嘆曰性相近也習
相遠也教則所以端其習而復其性也顧不重歟
由是精進不已才器成而試于用豈非興平治理
之一資乎此余建學延師之本意也
因爲說俾諸生體余心而自勵云

睢州儒學在州治內明洪武三年知州楊時敏建

謝光王珣相繼增修成化間淪于水知州鄧鼎徐

鎡任秉一修建規制大備後以水廢嘉靖三十三

年知州王佐修葺

舊府志

新學在南城中明末城淪

于水舊學淪沒

國朝順治十年提學李愨檄知

州張元品修復舊學大殿甫畢而水又入城康熙

十年知州程正性始定議于南城卜地創建泮水

澗絅宮牆環繚郡人湯斌紀其事巽方起奎星樓

則知州馬世英圖其功也又于大殿後創尊經閣

生員馬淑光輸書籍其中康熙三十二年知州陳

應輔復加改建

睢州志

國朝湯斌睢州移建廟學記

睢州儒學舊在北城濯錦池上規模宏敞

明末黃河決城遂淪于水有司權奉先師主于南城民舍地甚湫隘殿廡之制不備堂齋皆缺諸生無所肄業屢議改建以財用匱乏莫有毅然任其事者今國家之治休洽康熙十年辛亥郡守程公始至虞無以興學育材仰承朝廷德意期年政通事簡乃相廟東得趙氏宅基地勢高聳水環如壁羣情咸合于是捐俸購之州薦紳諸生各量力捐助經始于癸丑二月先建大殿次及兩廡戟門櫺星門各如制啓聖祠在聖殿左明倫有堂名宦鄉賢有祠樹以崇坊繚以周垣位序丹雘應圖合禮相其規制稽其出納朝夕省視久而不懈者學正魏君也乙卯七月既訖工公率卿大夫士行釋菜禮有作而言者曰公可謂學道君子深識治本者矣吾州自舊學淪沒已歷三紀况當軍旅倥

魯不廢公儲不勞民力成此禮樂弦誦之區非深
識治本者歟孔子曰君子學道則愛人公爲政巨
細有體而大指歸于寬厚更于化民成俗孜孜不
遑如此非學道有得者歟乃羣起屬余爲記余謂
公加意學校至矣諸生亦思所以爲學而求進于
古入之道乎抑徒飾文辭溺訓詁苟得利祿誇耀
一時已乎夫朝廷廟學並建固期皆以聖人爲
宗聖人之學存心而已存心者存天所與我之理
而已微而不睹不聞顯而人偷日用何莫非天理
所存也堯舜禹之相授受必致辨于人心道心之
危微孔子十五志學至七十始從心所欲不踰矩
然則聖人之異于人者惟在朝乾夕惕自強不息
遂至與天爲一耳成湯文武之爲君臯陶伊傅周
召之爲臣以及顏曾思孟諸大賢時至事起功業
各不相同而其深憂大懼不得已之心則千古一
揆也是以行無轍迹言無倣效總以此心純一粹
白相證於穆之表而非從勲業文章一一較論也
近代濂洛關閩及河東姚江諸大儒紹千載不傳

之緒雖風會所值指授各殊而道本于先後若一
其補偏救弊亦有大不得已焉者學者不體驗于
性情踐履與古人相見于精神心術之間則爲已
功疎隱微多歉卽著書滿家于道無當也惟知道
之大原出于天而體用具于吾心存養省察致
其功信顯微之無間悟知行之合一喜怒哀樂必
求中節視聽言動必求合禮子臣弟友必求盡分
蘊之爲天德發之爲王道此學問之極功而尊信
聖人之實事也然有難言者學路久迷習染日深
利欲之根難斷巧僞之術益工苟非乘本體之偶
露急加體認擴充之力如火然泉達悠悠玩愒歲
月幾何轉眼遲暮躑躅同歸大禹之所以惜寸陰
而尚書有取于若藥瞑眈豈不以此歟若曰吾志
在于科名惟是揣摩帖括他不暇計焉是視聖賢
六經祇爲富貴利達之資非惟負朝廷建學立
廟之意亦豈賢邦君所望于君子者哉公之爲政
也立社學以端蒙養講鄉約以厚風俗勸農均役
修城弭盜大兵往來供應有方使四境安堵可稱

循良矣而卜地建學尤其功之大者魏君操理清
端足爲人師兩賢集于一時吾見教學之易成也
因述所聞與諸君共勵焉公名正性字存存鄉貢
士四川萬縣人魏君名湛字聞野順治戊子舉人
孟津縣人州判劉君芳聲吏目許
君宗連皆共襄所役者例得並書

錦襄書院在駱駝岡院舊爲尼菴明嘉靖四年提

學蕭鳴鳳改建

舊府志

明末沒于水康熙九年郡人

吳淇重建二程子祠堂前立菊泉亭

睢州志

明胡績宗初杲過錦襄書院聯句二首

鬱葱桂木
陰駝岡此

日乘高結草堂鄉里衣冠歸洛社春秋俎豆衍睢
陽百年化洽絃歌誦一代文明樸棧光況是州人
能製錦何當補袞上岩廊伊洛門墻何處高錦
襄岡阜戴靈鰲槐陰好鳥啼長日鶴駕輕風度遠

霄簾捲天空奎壁燦堂開雲淨鳳鸞翔
瓣香仰止明祠下喬嶽巖巖首重搔

繪川書院在新城大街爲行館廢址康熙十四年

知州程正性以錦襄書院在水中往來不便改建

書院選諸生肄業焉

睢州志

道存書院故當陽令李遙家塾知州馬世英捐俸

延師以教人士

睢州志

社學在各里凡三十有二今廢

舊府志

謹按睢州舊志社學三十有二曰關東社關

西社關中社北關社祠前社大成社三皇社

平岡社龍塘社河堤社李集社王老人社帝
邱社孫聚社野雞岡社官亭社匡墻社伯當
社郭村社海州社俞公社老堤嶺社橋廂社
大岡社西陵社寄陵社大寨社厚臺社鄭莊
社渾子社長岡社申明社以教民間子弟舊
制每社設教讀一名先訓大誥三篇及教民
榜文修身治家事君事親居官治人之道皆
具其中蓋先端其蒙養而後他日可資用也
社田各學豐約不齊共計二十三頃一十六

畝正稅之外一以供其學師嗣後嘉靖戊午
巡撫章公煥築新城工料之屬盡籍諸民乃
併社田及學基地五十五畝而鬻之由此師
儒流散學社蕩然古典之墜靡有子遺惜哉

考城縣儒學在縣治東南明洪武二年知縣杜思
進創建正統間知縣鄭道重修嘉靖二十六年知
縣况澄章裴相繼修葺

舊府志

元至元二年河防廳

李茂重修撰有碑記明萬曆十五年知縣杜志晦
重修名宦鄉賢祠崇正十六年知縣楊起元教諭

王宜中重修 國朝順治三年睢陳道李芳蘊督

修墻垣六年管河道方大猷率屬修葺九年知縣

劉愈竒重修康熙年間知縣劉際昌訓導郭烜教

諭王光臯知縣張璜教諭彭象升訓導趙允涓又

相繼增葺

考城縣志

社學在西門內久廢明萬曆二年知縣馮尙更建

南郭今不可考

考城縣志

義學二一在縣治西察院內康熙二十九年知縣

張璜建一在縣西南史村鋪集併地四十畝康熙

二十四年候補內閣中書趙燦捐建

新增府志

柘城縣儒學在舊城縣治東明洪武三年知縣王

智建

舊府志

成化三年知縣朱佐徙建張瑄王翊復

修正德八年知縣李二仍遷舊址後胡世忠李一

貫等續修之嘉靖中圯于水三十三年知縣姜壽

改建于新城東門之內萬曆十三年知縣馮榛重

修泮池建名宦祠 國朝順治十三年邑貢生王

欽建鄉賢祠康熙二十四年知縣閔英瑞重建大

成殿康熙三十三年知縣史鑑重建名宦祠文昌

閣魁神樓

新增
河志

明徐養相重修柘城廟學碑記

孔子之道大明當
天萬世綱常所由

昭著修道立教莫先于學鼓舞作興則有司事爾
柘之學往湮于河廟貌蕩析無存欲聚學士以教
之無由也嘉靖乙卯知縣壽始立明倫堂借置殿
庶命教官馬體董其事不日告成足以煥宮墻群
多士矣萬厯紀元知縣張獻可聿新廟宇葺齋堂
師儒有居士學有藏修之所門墻池沼丹堊鼎楹
罔不備飾經始于乙亥之春至丙子夏告成財弗
仰于公帑力弗藉于編氓蓋皆太守賴公庭檜丕
振于上本州忠齋張公承恩協贊于下及邑長學
博之捐俸鄉士大夫邑民之尙義者爲之釋菜有
期教官士子來謁文以紀其事余惟古之王者建
國君民教學爲先虞夏殷周之學皆所以明人倫
也人倫明于上小民親于下二帝三王所以享有
道之治用是道也皇上御世建立學校帥尊孔子

所以講明倫理扶植綱常者實賴于茲惟起而新之學者庶其由禮門義路而造升堂入室之奧乎庶亦因泮水之澄澄而見鳶飛魚躍之天乎抑亦沐江漢之餘波暴秋陽之餘暉仰皞皞之盛乎不然嗣遺響于金聲玉振之後乎宣一氣于太和元氣之中乎或者追三代之英復周公之夢行其所謂老安少懷之願厝斯世于唐虞是未可知也語云待文王而興者凡民也使諸生誦法孔子而猶不足以興起斯文豈豪傑也哉當今天子勵精教化宰相加意人材司學教者惴惴焉以人倫不明士風不古爲慮張令卽姜侯之成規乃能興學校振綱常其精白以承休德意甚渥也予欲俟觀厥成敬爲文以紀其始

朱陽書院在縣東關邑人翰林院庶吉士竇克勤

知縣史鑑捐資倡修每月集邑弟子課藝講學繼

美嵩陽一時稱盛

柘城縣志

朱陽書院建于朱襄氏故

都之陽故取名焉邑紳實大任創建有先聖殿祀

孔子有先儒祠崇祀七賢有正學祠祀五儒按竇

克勤朱陽書院志七賢者宋周子濂溪程子明道

程子伊川張子橫渠朱子晦菴元許子魯齋明薛

子敬軒五儒者明曹月川

端

呂新吾

坤

竇筠峰

如珠

國朝湯潛菴

斌

耿逸菴

介

於康熙四十三年始入

祀典

新增府志

國朝胡介祉朱陽書院記

中州柘城有著姓曰竇氏族大才多而靜菴太

史宗文尤顯當明季鼎沸之時太史祖筠峯先生力闢異端尊崇聖學紹關濂洛之傳闡鹿洞鵝湖之教惜乎未竟厥志而太史父道康先生及太史接踵前徽海內稱竇氏三世講學焉先是天下有四大書院與學校相表裏而嵩陽睢陽竝在中州數百年來風教之隆人文之盛惟兩河爲最及乎兵燹迭臻僅餘故址其不委之荒烟蔓草中者幾何矣恭逢

聖天子在上重道崇儒棧樸菁莪之化遠昭前代一時文風振起書院稍稍復其舊制嵩陽之興實惟登封耿逸菴先生身任其事而太史時相過從折衷天人性命之微講求誠意正心之理贊襄率作與有力焉惟是睢陽書院之遺尙似有待及太史戊辰捷南宮讀書中秘道康先生乃闢地于柘城東門外爲書院會太史丁母夫人艱旋里助先生鳩工庀材遂告成事經營于庚午之歲落成于辛未之秋以其地爲古朱襄氏舊墟故顏曰朱陽書院基址廣袤門垣宏麗進而聖殿三楹再進而

講堂三楹存誠在其東主敬在其西庖福廡舍無不具備不惟與嵩陽遙峙爭輝抑且繼睢陽之遺烈嗚呼盛哉太史之功真足仰承道康先生以善繼筠峯先生之志也夫余于辛未承乏茲土念兩河爲人文淵藪之地竊有意鼓勵人才亦嘗隨諸公後修復大梁書院特以簿書鞅掌不獲一登朱陽之堂聿觀其盛爰記數語志景仰之思云若太史三世家學窮理盡性繼往開來夫人能知之又不俟余言之瑣瑣也

社學八處四在城四在鄉

舊府志

新設義學九皆知縣史鑑設立

柘城縣志

謹按自古學校之設導以師長攻以德藝無一民不相聯屬正歲孟月之吉黨里社塾之

會無一時不相警策故教行俗成而君師之分盡今天下郡縣學校而外所在皆有書院中州義學社塾較大江南北更盛顧名雖在而事未舉者何哉士子率借講院爲聲利之場長奔競之風而掌其教事者不過取其善爲科舉之文而易得售于場屋而已從未有取胡安定湖學之法以爲課士之程者訓導諸生何以有立昔方正學論務學云學將以學爲人也將以學事人也將以學治人也呂

新吾社學要畧云不因科第而後讀書不必
作文而後爲學凡自命爲學者盍取方呂二
公之言三復之